

Wasika-à Bulus Ba Ya Sig Mpìrká Mà AFISA

Wasika-à Bulus ba ya sig mpìrká mà Afisa níng ri tàg yi rag Yesu Kristi shí nì shinn kó kai bidim pàr áyau buká Shìdun mà̀m sig. Ku kab síg nì. Mpìrká bidim pàr abig kwonn shinn ma Yesu Kristi abig shi í bu nzyun, Kristi shí nì shinn-à. Wà mpìrká ma sa hing àdòning, Shìdun má fig àjwár. Mpìrká zyun-à bir fig ma pìkyinn bàna níng má myàng barà gbìb-à hi sà̀n sig à̀ni.

Bulus Bib Kà Mpìrká Mà Afisa

¹ Wasika-à níng í mì Bulus ba síg nì, mì zyun-à Shìdun zìm sig rag n shi wùn aswam Yesu Kristi. Mì ri ba ya níng, ning mpìrká mà fin swann Afisa, ningká zyun-à níng ri bàg Yesu Kristi ma pìkyinn nzyun áyau shuná nì.

² Shìdun Tayí ma Shinn Luyí Yesu Kristi abig wìr kà ya ning àsàn kwonn ma pìkyinn na tag.

Shìdun Sa Sà̀n Ya Sig Yi Dò Jir Shinn Kristi

³ Ayi swam yan Shìdun Ta Shinn Luyí Yesu Kristi, jir kai bàna ku wìr kà ya sig yi àsàn á jir barà yi ri bàg Kristi. Ku ya sig yi Awunwá, n sinn kàng rìghing yi mpìrká buwá mà wai. Ku wìr kà ya rìghing yi àsànwá bidim pàr.

⁴ Sai-à Shìdun rì mà̀m fig ma dunyaru bàna níng, ku shig zu rìghing yi ayi shi mpìrká buwá,

á jir shinn Kristi ni, àjirà ayi shi mpìr kyìkyàr, ma ayi shi mpìr asa bu bibai á pyànnwá ni bàna.

⁵ A jir azìm-à Shìdun ri zìm yi níng, í bu-à sa ku sìnn sig yi rag ayi shi yanká buwá á jir shinn Yesu Kristi ni. Ku sa sig wàníng ma àsàn-à ku shi sig ma kàhi, àràg barà ku ri zìm.

⁶ Ayi swam yan ning Shìdun á jir àsàn ùwài-à ku shi sig ma kàhi, barà ku ya sig yi Wùnwá átai, zyun-à ku ri zìm wàni níng.

⁷ A jir barà Kristi wu sig á dò jir shinnyí ni níng, Shìdun zìg zu rìghing yi n yafa ya rìghing yi bu pyìryí. Asànwá kab síg nì bu kó ni bidim pàr.

⁸ Shìdun wìr kà ya rìghing yi àsàn-à níng ùwài níma, ku ya sig yi átai.

Ku ya rìghing yi yar bu bidim pàr.

⁹ Ku dinya rìghing yi bu-à ku rì dinya fig mpìrká wàri níng bàna. Ku dinya rìghing yi yìr bu-à sa ku swam bi sig wùnwá Kristi á dunyaru, jirà swai mpìrká bidim pàr ma bir hing pìkyinn á byarwá ni bá wìm zu.

¹⁰ Bu-à Shìdun ri zìm aku sa níng, wà àyúnn-à hi ma màg hing, kwá sa vinn rìg bu-à hi. Kwá sìnn kwonn buká ku màm sig bidim pàr, ká mà wai ma ká á jìnn ni í byar ñzyun. Kwá sìnn kà Kristi má shí nì shinn kó kai bidim pàr.

¹¹ Shìdun ri sa kó kai bidim pàr àràg barà ku rì sìnn sig rag kwá sa. Ku shig zu sig yi rag ayi shi mpìrká buwá ma ayi kwonn shinn ma Kristi. Wàníng í bu-à Shìdun rì sìnn sig á kyinnwá ni rag kwá sa sai-à ku màm fig ma dunyaru bàna.

12 Barà yi í mpìrká bir jag sig pìkyinn á byar Kristi ni níng, to ayi swam yan Shìdun, ma ayi yì rag Shìdun í mpìr ùwài.

13 Ning tinn má, sai-à ning fig jag sig jir Kristi wà zyun-à í jir àjwár barà ná wìm zu níng, ning bir hing pìkyinn á byar Kristi. Barà ning bir pìkyinn á byar Kristi ni níng, í wà Shìdun ya ning Awunwá wà ku gib ya sig ning nu níng. Barà ku sa sig àdòning, shi sig àràg ku kyag sig yir á òrná ni jirà aning yì rag ku í Shinn Luná.

14 Shìdun ya sig yì Awunwá àjirà ayi yì rag kwá ya yi bu-à ku gib ya sig mpìrká buwá nu rag kwá ya níng. Awun Shìdun ri sa yi, yi ri yì rag Shìdun má zìg zu rìg yi. Ayi swam yan Shìdun, ma ayi yì rag Shìdun í mpìr ùwài.

Bulus Vig Shìdun

15 Jir wàning barà ò fig tai big rag ning bir pìkyinn á byar Shinn Luyí Yesu ni, ma barà ning ri zìm mpìrká bu Shìdun níng,

16 mì ri sa kyann Shìdun ísoko á jir shinn ná ni. Sai-à ma vig Shìdun bidim pàr, mì ri kyab pànn kwonn ma ning, mì ri vig ku á shinn ná ni.

17 Mì ri vig kyann Shìdun bu Shinn Luyí Yesu Kristi, Shìdun àsàin-à shi síg ni Tayí wà ùwài-à. Mì ri vig ku rag aku ya ning Awunwá àsàin-à má sìn kàng ning aning shi mpìr yar, jirà aning yì byann ku.

18 Mì ri vig Shìdun rag aku sa àyarwá aku kà á kyinn ná ni àjirà aning yì bu-à ning ri bir kyinn áni, wà ku bar sig ning à byar kàhi níng, ma aning òg àsàn-à ku gib sig nu rag kwá ya mpìrká buwá níng.

19 Gbamwá ri sa swàm wàni á kyinnyí ni, yi ká yi bir sig pìkyinn níng. Gbam-à ri sa swàm á kyinnyí ni níng,

20 í gbam-à ku gbar dù nann zu kàng sig Kristi ma kàhi mà amir-à ni, n sìnn wàníng a wàníng shi agunn vìm nuwá ni mà wai.

21 Kristi ri na kùr mà wai á shinn àgbamká mà wai ni, ma á shinn buká shi sig ma gbam, ma kùrká. Gbamwá kab síg nì gbam buká shi sig á dunyaru-à níng ni, ma ká mà wai.

22 Shìdun sìnn kà kó kai bidìm pàr á mìr bar Kristi ni, Shìdun ya ku rag aku shí nì shinn kó kai bidìm pàr. Ku shi síg nì shinn mpìrká ri bàg ku bidìm pàr.

23 Mpìrká ri bàg Kristi bidìm pàr big í òr Kristi. Mpìrká ri bàg Kristi níng, pìkyinnbá shi sig á byarwá ni. Ku í àsàin-à ri sa kó kai bidìm pàr ri shi ábibir.

2

Yi Rì Wu Rìghing, Tàma-à Níng Yi Wìm Kàng Ma Yonki

1 Sai-à rì níng, ning rì shi sig àràg ning wu rìghing jir shinn bu pyìrná, ma barà ning rì wib fig Shìdun bàna níng.

2 A sai-à níng hi, ning rìi bàg bu bibaiká shi sig á dunyaru, ning rì wib kùr wàu àsàin-à tàma-à níng ku ri sa swàm á kyinn mpìrká ri wib fig Shìdun bàna níng.

3 Sai-à rì níng, yi bidìm pàr yi rì shi sig àdòníng. Yi rì shi sig shuyí àràg barà kyinnyí rì zìm, yi rì sa sig buká òrìyí ma kyinnyí rì zìm. Yi rì í mpìrká bibai àràg mpìrká kádà níng. Buká

yi rì sa sig níng fòr hing wà Shìdun nìm má ya yi shwìn.

⁴ Ama Shìdun ri myàng ashi mpìr wàni, azìmwá kab gbam.

⁵ Yi rì shi sig àràg yi wu rìghing jir bu bibaika yi sa sig á pyànn Shìdun ni. Ama Shìdun ya sig yi yonki àpyú, yi ma Kristi. Shìdun pinn zu síg ning á jir àsànwá ku shi sig ma kàhi.

⁶ Shìdun gbar dù nann zu kwonn sig yi ma Kristi n ya sig yi byar shu ma ku mà wai.

⁷ Shìdun sa sig àdòníng jirà aku tàg àsàn ùwàiwá á byar mpìrká bá mà á pyànn. Shìdun tiya rìghing yi barà ku ri zìm yi wàni, barà ku swam bi sig wùnwá Yesu Kristi níng.

⁸ Shìdun pinn zu rìghing ning ma àsàn-à ku shi sig ma kàhi á jir shinn pìkyinn birná ni. Ning pinn zu fíg nì shinn ná bàna. Shìdun pinn zu síg ning átai.

⁹ Shìdun pinn zu fíg ning jir swàm òsànká buná ning rì sa bàna, kada mpìr aku gbar àshí bàna.

¹⁰ Shìdun màmm sig yi ma vùwá. Barà yi kwonn sig shinn ma Yesu Kristi níng, Shìdun màmm kàng rìghing yi mpìr àpyú big, jirà ayi sa swàm òsàn. Swàm òsàn káníng sai-à wà jijag Shìdun rì sìn sig rag ayi sa àdòníng.

Mpìr Yahudawaká Ma Mpìrká Ká í Yahudawaká Bàna, Big Shi Sig í Bu Nzyun Ayau Gbìb Kristi

¹¹ Ningká big mà fig ning áyau Yahudawaká ni bàna níng, aning kyab pànn rag sai-à rì níng, ning rì shi sig kim. Yahudawaká rìi bar ning,

“Mpìrká ri kyag fig jur bàna.” Big bar shinnbá rag, “Mpìrká ri kyag jur.”

¹² Aning kyab pànn barà ning rì shi sig. Sai-à rì níng, ning rì kwonn fig shinn ma Kristi bàna. Ning rì í mpìr Israila bàna. Ning rì kà fig áyau mpìrká Shìdun shig zu sig níng bàna. Ning rì yì fig nu-à Shìdun gib ya sig mpìrká buwá bàna. Ning rì yì fig nu-à Shìdun gib sig rag kwá zìg zu mpìrká buwá níng bàna. Ning rì bir fig pìkyinn bàna, ning rì yì fig Shìdun bàna.

¹³ Sai-à rì níng, pyunn ná rì nonn hing ma Shìdun. Ama tàma-à níng, á jir shinn Yesu Kristi ni, ku zìg bi yàr rìghing ning á pyànnwá ni. Shìdun zìg kàng bi síg ning dò jir shinn àsà-à Kristi kìfinn sig.

¹⁴ Kristi í àsàin-à gbar jùn kwonn sig yi. Ku sìnn kwonn Yahudawaká ma mpìrká zyun-à í Yahudawaká bàna níng í bu nzyun. A jir ki-à Kristi wu sig níng, ku gban rìghing akyib áyaubá ni.

¹⁵ Kristi kan rìghing akyib áyau mpìr Yahudawaká ni ma mpìrká zyun-à í Yahudawaká bàna. Ku kìm rìghing gbam doka Yahudawaká á jir shinn ki-à ku wu sig. Wàníng í barà ku sa n gbar jùn kwonn sig mpìr Yahudawaká ma mpìrká zyun-à í Yahudawaká bàna, abig shi í bu nzyun. I wà ku gbar bi big á byarwá ni.

¹⁶ Barà Kristi wu sig dò jir mpìrká níng, ku kan rìghing akyib áyau mpìr Yahudawaká ma mpìrká zyun-à í Yahudawaká bàna níng. Ku sìnn kwonn sig big abig shi í bu nzyun, n gbar jùn kwonn hing big ma Shìdun.

¹⁷ Kristi bi n dinya ning jir àjwár wà ri ya

pìkyinn na tag, ning mpìrká zyun-à ning í mpìr Yahudawaká bàna níng, wàrì níng ning rì nonn hing ma Shìdun. Ku dinya mpìr Yahudawaká bi yàr sig á byar Shìdun níng jir àjwár-à níng tinn.

¹⁸ I jir shinn Kristi í bu-à sa yi bidìm pàr, kó mpìr Yahudawaká, kó mpìrká zyun-à í Yahudawaká bàna níng, yi díg sig Awun Shìdun, í wà yi ri bi rag á pyànn Shìdun.

¹⁹ To tàma-à níng ning mpìrká zyun-à ning í mpìr Yahudawa bàna níng, ning shi fig rag mpìr kim big bàna. Tàma-à níng, ning ma mpìrká bu Shìdun shi sig í bu nzyun. Ning shi sig áyau lu Shìdun ni tinn.

²⁰ Ning mpìrká bir sig pìkyinn ná níng, ning shi àràg í lu-à Shìdun mi sig. Lu-à hi í yann aswamká bu Shìdun ma mpìrká rii dang kyann jir Shìdun, jag sig nì mìn-à. Kristi ma shinnwá ku í abàn zyun-à kab sig abànká kádà áyau lu-à ni.

²¹ Lu-à hi bidìm pàr, Kristi í àsàin-à pànn kwonn sig lu-à hi. Ku í àsàin-à ri sa wài lu-à hi, í wà lu-à hi ri wài mi ri kàng lu kyìkyàr bu Shìdun.

²² Barà ning kwonn sig shinn ma Kristi níng, big mi kà kwonn sig ning ma mpìrká kádà níng áyau lu Shìdun ni, byar-à Shìdun má shi áyau Awunwá ni.

3

Swàm-à Bulus Sa Ya Sig Mpìrká Zyun-à í Yahudawa Bàna

¹ To, mì Bulus, zyun-à big kìg sig mì á tonn fi dò jir barà mì ri dinya ning jir Yesu, ningká ning í mpìr Yahudawaká bàna níng.

² Mì ri kyab ning fig rìghing wà Shìdun ya rìghing mì swàm-à níng n sa. Swàm-à ku ya sig mì níng ku rag n dinya ning, ning mpìrká zyun-à ning í mpìr Yahudawa bàna níng, n dinya ning jir á shinn àsànwá ku shi sig ma kàhi.

³ Sai-à rì níng, Shìdun rì dinya fig mpìrká barà kwá pinn zu mpìrká zyun-à í Yahudawa bàna níng, áni bàna. Ama ku tìya hing mì, àràg barà n ba ya sig ning.

⁴ Wà na jangga hing bu-à n ba sig níng, ná yì byann bu-à n yì sig barà Kristi ri pinn zu mpìrká áni.

⁵ Wàri níng Shìdun rì dinya fig mpìrká barà kwá pinn zu mpìrká áni bàna. Ama tàma-à níng ku dinya rìghing yann aswamwá ma mpìrká ri dang kyann jir Shìdun áyau Awunwá ni.

⁶ Bu-à mì ri dang rag wàri níng Shìdun dang fig bàna níng, í wàníng: sai-à mpìrká zyun-à í Yahudawa bàna níng bir pìkyinn á jir àjwár bu Kristi ni, big dìg àsàn Shìdun àràg barà mpìr Yahudawaká dìg sig níng. Big kàng rag agunn òr Kristi, àràg mpìr Yahudawaká. Big tinn má, big dìg bu-à Shìdun gib sig nu rag kwá ya mpìrká bir sig pìkyinn á byar Yesu Kristi ni, àràg barà ku ya sig mpìr Yahudawaká.

⁷ N kàng sig mpìr-à ri dang kyann jir àjwár-à níng ásai-à Shìdun wìr kà ya mì àsànwá kwonn ma sai-à gbamwá sa swàm á pìkyinnmí ni.

⁸ Mì í àsàin-à àsànmí zwau kab sig àsàn mpìrká bu Shìdun. Ama bidim pár Shìdun ya

mì pyù rag ñ sa swàm wà ku ya sig mì rag ñ dinya mpìrká zyun-à í Yahudawa bàna níng jír bu ùwàiká á shinn Kristi ni.

⁹ Shìdun àsàin-à màm sig kó kai bidim pár níng ya sig mì rag ñ tiya mpìrká bidim pár gbìb-à ku sinn sig, àjirà mpìrká bidim pár abig yì byann bu-à ku rì tiya fig mpìrká wàrì níng bàna.

¹⁰ Ku sa sig wàníng, àjirà á dò jir mpìrká bir sig pìkyinn á byar Yesu ni, àgbamká mà wai ma bu gbamká shi sig mà wai, abig yì yar Shìdun barà shi sig gbìb kim kim.

¹¹ Ku sa sig àdòníng á byar Yesu Kristi ni, àràg barà ku kyab sig daka sai-à ku màm fig ma dunyaru bàna, n rag kwá sa.

¹² Tàma-à níng yì kwonn rìghing shinnyí ma Kristi. Dò jir pìkyinnyí yì bir sig á byarwá ni níng, yì díg sig pyù-à yá kà mà byar Shìdun ni, zinn bàna.

¹³ Jír wàníng, mì ri vig ning kada aning wor awor jirà mì ri wa shwìn á shinn ná ni níng bàna. Shwìn-à mì ri wa níng, mì ri wá jirà aning díg bu òsàn.

Bulus Vig Shìdun Rag, Mpìrká Ri Bàg Yesu Mà Afisa Abig Zim Mpìrká

¹⁴ Jir wàníng, mì ri binn kir wann á pyànn Shìdun Tayí ni, mi ri vig ku.

¹⁵ Ku í Ta mpìrká bidim pár, ká mà wai ma ká á jinn ni. Big díg sig zinnbá á byarwá ni.

¹⁶ Mì ri vig ku rag áyau awàiwá ni, aku ya ning gbam á byar Awunwá ni, aku ya ning pìkyinn wim.

17 Mì ri vig Shìdun, Kristi aku shi kà á pìkyinn ná ni wàni, á jir pìkyinn birná ni. Mì ri vig Shìdun rag ná zìm swàb kà mpìrká wàni,

18 àjirà ning ma mpìrká bu Shìdun bidim pàr aning yì byann barà azìm-à Kristi ri zìm yi níng, wài sig áni, n zwàun sig áni tinn, azìmwá ri kinn kà fig bàna, azìmwá shi sig kó áni bidim pàr.

19 Wà má àdòníng, ná yì barà Kristi ri zìm yi áni, wà kab sig gbam barà yá yì byann. To, jir wàníng, àsàn Shìdun aku kà mònñ á kyinn ná ni.

20 Shìdun ri sa sar bu-à kab wà yi ri vig ku ma wà yi ri kyab, ku ri sa wàníng á byar gbmawá ni, wà ri sa swàm á pìkyinnyí ni.

21 Mpìrká abig swam yan kyann ku kó ákaun bidim pàr, hár kinn kinn á dò jir shinn mpìrká ká ri bàg ku, ma dò jir shinn Yesu Kristi. Aku shi àdòníng.

4

Mpìrká Ri Bàg Kristi Bidim Pàr Big í Bu Nzyun

1 Jir wàníng, mì zyun-à big kìg sig á tonn fi dò jir Shinn Luyí níng, mì ri vig ning, aning shi shu àràg barà Shìdun bar sig ning aning shi níng.

2 Aning shi mpìr agbar dù shinn bàna, aning shi mpìr wib, ma aning sa kyann muyar. Aning tàg azìm áyau buká na sa shang bar dìná.

3 Aning kar ngang ma aning shi í bu ízyun àràg barà Awun Shìdun sinn kwonn sig ning aning shi, aning gáfinn bàna. Pìkyinn na tag-à Shìdun ya sig ning níng í bu-à pànn kwonn sig ning.

⁴ Yi bidim pár yi shi sig í dìr nzyun áyau Kristi ni. Yi shi sig áyau Awun nzyun tinn, àràg barà bu-à yi ri sinn kyinnyí áni shi sig í bu nzyun wà zyun-à Shìdun bar sig yi jir kàhi.

⁵ Shinn Luyí í nzyun. Pìkyinn biryí á byarwá ni í gbìb nzyun. Dìr batisma-à big ri wau yi níng, í gbìb nzyun tinn.

⁶ Shìdun í nzyun. Ku í tayí, yi bidim pár, ku í Shinn Lu kó ni bidim pár. Ku ri sa swàmwá á vù mpìrká ni bidim pár. Ku shi sig áyau mpìrká ni bidim pár.

⁷ Yi shi sig ma swàm kim kim zyun-à kó ni má sa àràg barà Kristi ya sig yi.

⁸ Wàníng shi sig àràg barà big ba sig á jir Shìdun ni n rag:

“Sai-à ku nann zu yag mà wai níng,
ku zìg kwonn ma mpìrká big kùg kà sig á tonn
fi-à ni.

Ku ya mpìrká swàm-à káníng má sa.”

⁹ Yìr bu-à sa big dang rag, “Ku yag mà wai níng”, í kai ra? Yìr bu-à sa big dang rag ku yag sig mà wai níng, í jirà ku rì wann bì sig á dunyaru.

¹⁰ Mpìr-à àsàin-à wann bì sig mà wai níng, ku í wà zyun-à yag sig mà wai, jirà aku shi mà wai ma byar-à á jinn ni bidim pár.

¹¹ Ku sinn kà sig mpìrká kákí abig shi yann aswam, mpìrká kákí abig shi mpìrká ri dang kyann jír wá, mpìrká kákí abig dinya mpìrká bir fig pìkyinn bàna níng jir àjwár á shinnwá ni, mpìrká kákí abig shi Pasto, mpìrká kákí abig tàg mpìrká.

¹² Ku sa sig wàníng, jirà mpìrká buwá abig sa yì swàmwá, ma abig sa mpìrká abig bir swàb kà pìkyinn á byar Yesu ni.

¹³ Wà má àdòníng yi bidim pár pìkyinn biryí má shi yag í gbìb ñzyun. Yá yì wùn Shìdun má fòr mpìrká bu Kristi má shi àràng barà Kristi shi sig.

¹⁴ Wà ya shi hing àdòníng bá tonn gban fig yi bàna. Yá shi fig rag àràng yann wùnshái bàna, ká big ri tonn gban big mi ri gbar vim bir pìkyinnbá, mi ri tàg big yar bu-à shi sig í yar á finn mpìr.

¹⁵ Bu-à ya sa bàna, ayi dang jír àjai bu Shìdun. Ayi zìm mpìrká. Wà ya sa hing àdòníng, yá shi àràng barà Kristi shi sig, ku zyun-à ku í shinnyí.

¹⁶ To, barà Kristi shi sig í shinnyí níng, yi shi sig í òrúwá. Yi shi sig í bu ñzyun. Kó agunn òrú-à wà áni bidim pár shi sig ma swàm-à kwá sa. Swàm-à kó agunn-à wà áni ri sa níng, í bu-à sa òrú-à ri wai. Wàníng í barà yi ri yì swàb kà jir Kristi áni, mi ri zìm bar òrúyí.

Yonki Apyú á Gbìb Kristi Ni

¹⁷ Mì ri dinya ning, mì ri twìb ning byur á zìnn Shinn Luyí ní, kada aning shi kàng shu àràng barà mpìrká yì fig jir Shìdun bàna ri shi níng. Bu-à big ri kyab á kyinnbá ni, sànn fig bàna.

¹⁸ Big ri shi á zufi-à ni. Big yì fig bu bàna, big ri gban sung. Big òg fig yonki-à Shìdun ri ya mpìrká níng bàna.

¹⁹ Big ri sa fig zunái ma bu-à bibaiká big ri sa bàna, big ri sa swàb kà yag bu-à bibai mà pyànn. Big ri zìm kyann íri bu-à bibai sa.

²⁰ Barà ning fig jir Kristi níng, big tàg fig ning àdòníng bàna.

21 Ning fig hing jír á shinnwá ni, ning bàg hing ku. Big tàg hing ning jír àjai á shinnwá ni.

22 Aning fim rìg shu àkor-à ning rì shi sig, shu zyun-à ri sa bai ning á jir bu bibaiká ri tonn gban ning.

23 Aning vim bìr kàng kyinn ná aku shi àpyú.

24 Aning zìg kyinn àpyú, zyun-à Shìdun mà m sig àràg kyinnwá, wà shi sig òsàn n kyàr hing.

25 Jir wàníng, aning fim òsàng gim. Kó ni bidim pár aku dinya jàuwá jír àbyann, jir kai bàna yì bidim pár yi í dìr Kristi.

26 Wà na dù hing kyinn, kada aning fim kyinn dùná aku gbar ya bí ning bu-à bibai sa bàna. Kada aning dù kyinn hár àyunn aku kà dìg ning ma kàhi bàna.

27 Kada aning ya Shaitan pyù bàna.

28 Mpìr-à rì ma ri jwi ajwú aku fim ajwú jwi, ma aku sa rag swàm òsàn ma vùwá jirà aku sa shang mpìr ashiká.

29 Kada aning dang jír-à bibai á nuná ni bàna, aning dang jír-à òsàn barà má gbar gban mpìrká dìr, hár mpìrká má zìm abig fig, àjirà bu-à na dang bidim pár má sà ya mpìrká má fig.

30 Kada aning sa bai kyinn Awun Shìdun bàna, jir kai bàna Awun Shìdun shi sig àràg í yir á dìrná ni, jirà aning yì rag, ning í bu Shìdun ma aning yì wà àyunn-à ma màg hing Shìdun má pinn zu ning.

31 Aning fim kyinn àzwànn, ma kyinn dù, ma àgùn nànn. Aning yan ta mpìr bàna, aning swau mpìr bàna. Aning zib mpìr bàna, aning sa mpìr akyib bàna.

³² Bu-à ná sa bàna, aning sa jàuná big bu-à òsàn, aning myàng ashi jàuná, aning yafa ya jàuná àràng barà Shìdun yafa ya sig ning á dò jir shinn Kristi ni.

5

Aning Shi Shu Ayau Ayar

¹ To, barà ning í yanká bu Shìdun níng, sai aning shi shu àràng ku.

² Aning shi shu azìm, àràng barà Kristi zìm sig yi, n ya sig yonkiwá á dò shinnyí ni níng. Barà ku ya sig yonkiwá á dò shinnyí ni níng, shi sig àràng ku twìb swànn ya sig Shìdun bu-à ri ning swìnn òsàn, àràng barà Shìdun ri zìm.

³ To, barà ning í mpìrká bu Shìdun níng, sànn fig wà aning kà àyau àyái sa bàna, ma swàm bu-à bibai ma sunu sa, bu káníng sànn fig wà a mpìr kyìkyàrká bu Shìdun sa bàna.

⁴ Kada aning dang jír àbai bàna, jír-à ma bàna ma yìr kada aning dang bàna, aning sa bu jonn àning bàna. Bu-à ná sa bàna, aning sa Shìdun ísoko.

⁵ Sànn sig aning yì jír-à níng. Mpìr-à ma ri sa àyái, ku ma ri sa bu bibai, ku ma ri sa sunu, kwá kà fig mà byar-à Kristi ma Shìdun má na kùrbá bàna. Mpìr-à ma ri zìm aku dìg gban rìg bu bidìm pàr, ku ri wib bu-à í Shìdun bàna.

⁶ Kada aning zìm a mpìr zyun tonn gban ning ma jír-à bàna ma yìr. A jir shinn bu káníng ni, í bu-à sa Shìdun ri nànn àgùnn ma mpìrká ri wib fig ku bàna.

⁷ Swai mpìrká àdòníng, kada aning kwonn shinn ma big bàna.

⁸ Ning má, ning rì shi sig á zufi-à ni, ama barà ning kàng rìghing mpìrká bu Shinn Luyí níng, ning shi sig rag á yiyar-à ni. Aning shi shu-à má tàg rag ning í mpìrká shi sig á yiyar-à ni.

⁹ Ayar í àsàin-à ri zìg bi bu òsàn, ma shu òsàn, ma bu àjai.

¹⁰ Aning sa bu-à má jwar ya Shìdun.

¹¹ Kada aning sa bu-à mpìrká shi sig á zufi-à ni ri sa bàna, buká big ri sa í bu zufi. Aning gbar zu bi big á yiyar-à ni.

¹² Wàníng shi sig í bu zunái wà ba dang bu-à bibaiká mpìrká ri bònna sa.

¹³ Wà ba zìg zu bi rìghing bu á yiyar-à ni, í wà mpìrká má myàng wà má í bu òsàn, kó bu bibai.

¹⁴ Bu-à àyar ma kà hing áni, mpìrká má myàng kyàr bu-à hi. Wàníng í bu-à sa big dang sig rag, “Wù zyun-à wù ri na aná níng, á fim zir, á dù nann zu kàng ma yonki.

Kristi má yar kà á òrjú ni.”

¹⁵ Aning pànn shinn ná, ma barà ning ri shi shuná. Kada aning shi àràg mpìrká shi sig á zufi-à ni níng bàna. Ama aning shi mpìr yar big.

¹⁶ Aning sa bu òsàn á pyù-à ning ri òg, jir kai bàna swann-à tàma-à níng bai rìghing.

¹⁷ Kada aning shi shu àning bàna, aning yì bu-à Shìdun ri zìm aning sa.

¹⁸ Aning shi mpìr awa pyann shin bàna, shin wa pyann má sa bai òrná. Ama Awun Shìdun aku kà mònn nì á pikyinn ná ni.

¹⁹ Aning dài ya jàuná jonn Shìdun bu Zabura, ma aning dài jonn-à swam yan Shìdun, aning

dài swam yan Shinn Luyí ma jonn Zabura, aning swam yan ku á kyinn ná ni.

²⁰ Aning sa kyann Shìdun Tayí ísoko á shinn kó kai ni bidim pá, á zinn Shinn Luyí Yesu Kristi ni.

Barà Wunù Ma Wàwá Má Shi Shu

²¹ Aning wib bar òrná, jir kai bàna ning ri wib Kristi.

²² Ning uwàkà, aning wib nùnà big, àràng barà ning ri wib Shinn Luyí.

²³ Wunù shi síg nì shinn wàwá àràng barà Kristi shi síg nì shinn mpìrká ri bàg ku níng. Kristi ma shinnwá ku í àsàin-à má pinn zu mpìrká ri bàg ku, káníng shi síg í òrná.

²⁴ Jir wàníng, uwàkà abig wib nùbá, àràng barà mpìrká bu Kristi ri wib ku níng.

²⁵ Ning wunùkà, aning zìm wánà big àràng barà Kristi zìm síg mpìrká ri bàg ku n ya síg yonkiwá á dò shinn káníng ni.

²⁶ Ku sa síg wàníng jirà aku sa kyàr mpìrká ri bàg ku, barà ku dang síg jir àjwár, n tu kyàr síg mpìrká ma zàpìr.

²⁷ Ku sa síg àdòníng jirà aku sìn kàng mpìrká abig shi buwá, abig shi òsàn níma, abig shi kyìkyàr, ma abig shi mpìrká bàna ma bu pyìr.

²⁸ Sànsig wunùkà abig zìm wàbá àràng barà big ri zìm shinnbá. Wunù-à ma ri zìm wàwá, ku ri zìm shinnwá.

²⁹ Walai mpìr-à ri ngàng òrná. Kó ni ri ya òrná buju, mi ri myàng kwonn ma òrná àràng barà Kristi ri myàng kwonn ma mpìrká ri bàg ku,

³⁰ jir kai bàna yi í òrná.

³¹ Jir Shìdun dang sig rag, “Jir wàníng, wunù má fim tawá ma nàwá, má shi ma wàwá, big pyànà bidim pár bá shi í bu nzyun.”

³² Mpìrká nìnànn nímá yì byann fig yìr jír-à níng bàna. Bu-à n yì byann sig bàna, jír-à níng ri dang á shinn Kristi ma mpìrká ri bàg ku.

³³ Jír-à níng ri dang big ning tinn. Kó ni aku zìm wàwá àràg barà ku ri zim shinnwá, uwà aku wib nùwá tinn.

6

Barà Yanká Má Shi Shu Ma Asàinká Mà Sig Big

¹ Ning yanká, barà ning ri bàg Kristi níng, aning wib àsàinká mà sig ning, jir kai bàna wàníng í bu-à sànn sig aning sa.

² Doka jijag wà Shìdun gib sig nu big kàhi í wàníng, ku rag: “A wib tawú ma nàwú,

³ àjirà á shi shu nèsàn ma á shi nonn á jànn-à ni.”

⁴ Ning ta yanká ma na yanká, kada aning yan ta yanká bigné barà bá bai kyinn bàna. Bu-à ná sa bàna, aning tàg samyib big nèsàn nímá ma aning tàg big jir Kristi.

Fàuká Ma Asàin Lubá

⁵ Ning fàuká, aning wib àsàin luká bigné, ká á jànn-à ni. Aning wib big ma aning shàr big, aning wib big ma pìkyinn nzyun, àràg barà ning ri wib Kristi.

⁶ Kada aning sa wàníng íri jirà big ri myàng ning, jirà aning dìg bu á vùbá ni bàna. Ama

aning sa ma pìkyinn ízyun àràng barà Shìdun ri zìm, barà ning í fàuká bu Kristi níng.

⁷ Aning sa swàmna ma pìkyinn àjwár, jir kai bàna ning ri sa yá Shinn Luyí, ning ri sa ya fíg íri mpìr bàna.

⁸ Ning yì hing swàm òsàn mpìr ma sa sig bidim pàr, kó ku ma í fàu, kó ku ma í fàu bàna, Shinn Luyí má wa ku.

⁹ Ning mpìrká shi sig big fàu, aning sa ya fàuná big bu-à òsàn, kada aning dang gib big kyinn bàna. Aning yì rag, ning ma fàuká bigná bidim pàr ning shi sig ma Shinn Luná mà wai. Ku ri shig fig zyun, mi ri fim fig zyun bàna.

Yi ri Ngáng Ngain Ma Shaitan

¹⁰ Aning sar gbam á gbìb Shinn Luyí ni, ku í àsàin-à ri ya yi gbam-à ku shi sig ma kàhi.

¹¹ Aning wìr kà jà àsháu bu kànn nu-à Shìdun ya sig ning, àjirà aning gbam kan Shaitan àsàin-à ri tonn gban mpìr níng.

¹² Yi ri ngang fíg ngain ma mpìr bàna, yi ri ngáng ngain ma yann sukàká bu Shaitan, ká í mpìr bàna, àsàinká pànn sig waisháu, n pànn sig mpìrká á dunyaru-à níng ni, mi ri na kùr á shinnbá ni.

¹³ To, jir wàníng, tàma-à níng aning wìr kà jà àsháu kànn nu bu Shìdun, jirà àyunn-à Shaitan ma ri zìm aku pànn ning, ná gbam kan ku. Wà na gbam kan rìghing ku ná shi kàng shuná.

¹⁴ Aning shi sa mímyib ma aning sìn gbam òrná ma jir àjai dang. Shu òsàn aku shí bu-à ná sìn á gwàin pìkyinn ná ni, àràng barà soja ri sìn bàg jà àsháu bu kànn nu.

¹⁵ Tabar-à ná pag á barná í jir àjwár bu Kristi dang kyann, wà ri ya pìkyinn na tag níng.

¹⁶ Barà soja ri gag dim shinnwá ma àkì níng, ning má aning gag dim shinn ná ma pìkyinn bir tinn. Wà na sa hing àdòníng, ná gag dim rìg àtíkà bu Shaitan wà ri swànn pyìr wà ku ri ta ning ma kàhi níng.

¹⁷ Barà soja ri bir kà abishinn kànn mi ri gag dim shinnwá ma kàhi níng, ning má aning kang shinn ná ma jír kyab á shinn barà Shìdun pinn zu sig ning. Barà soja ri sa swàm ma kafai níng, ning má aning sa swàm ma jir Shìdun wà Awunwá ri ya ning àràng í kafai.

¹⁸ Aning vig kyann Shìdun àràng barà Awunwá ri tàg ning. Bu-à ma nì ning bidìm pàr aning vig Shìdun. Jir wàníng, aning shi sa mímyib, aning wu tag òr bàna, aning vig kyann Shìdun á shinn mpìrká ri bàg ku bidìm pàr.

¹⁹ Mì má, aning vig ya mì Shìdun tinn àjirà sai-à ma ri zìm n dang jírwá aku ya mì bu-à má dang, àjirà n dang ma pìkyinn wim, àjirà mpìrká ká yì fig jir àjwár bàna níng, abig yì.

²⁰ Mì í mpìr aswam bu jir àjwár áshinn Kristi ni, tàma-à níng big kìg kà sig mì á tonn fi-à ni. Aning vig Shìdun rag n wim kyinn n dang jir àjwár-à níng, àràng barà sànn sig n dang.

Jír-à Bulus Dang Sig Wà Kinn Shinn

²¹ Tikikus wunzà azìmyí, zyun-à ri sa swàm Shinn Luyí ma pìkyinn nzyun, kwá dinya ning tai kó kai bidìm pàr á shinnmí ni, jirà aning yì barà n shi sig áni áyág.

²² Wàníng í bu-à sa mì ri swam yag ku á byarná ni, jirà aku dinya ning barà yi shi sig áni, ma aku dang tag wann ning pìkyinn.

²³ Shìdun Tayí ma Shinn Luyí Yesu Kristi, abig ya ning pìkyinn na tag ma pìkyinn barà ná zìm jàuná big, ma barà ná bir pìkyinn.

²⁴ Asàn Shìdun aku shi á pìkyinn mpìrká ri zìm Shinn Luyí Yesu Kristi, azìm zyun-à má vinn fig ávinn bàna.

Jibu
Jibu: Jir Shidun (New Testament)

copyright © 2019 Wycliffe Bible Translators, Inc.

Language: Jibu

Contributor: The Nigeria Bible Translation Trust

All rights reserved.

2025-05-06

PDF generated using Haiola and XeLaTeX on 5 May 2025 from source files
dated 6 May 2025

a1139895-fa13-5ff1-8c00-a8ad25fcfa2f